

Henk Hutting ta purba desbarata articulo di Telegraaf

“Parke di molina na Urirama lo no causa blackout semanal na Aruba”

ORANJESTAD – Berdad cu Aruba lo por a sufri varios blackout pa siman a consecuencia di e di dos parke di molina di biento na Urirama. Pero segun e persona encarga cu ambos parke, Henk Hutting, ta netamente pasobra nan a haci nan trabou bon, cu esaki no ta bay sosode. Asina Hutting ta desbarata e articulo cu a keda publica den e corant hulan- des Telegraaf siman pasa, cu ta purba desacredita e proyecto.

E articulo contra molina di Telegraaf ta carece di berdad, ta sugestivo y ta meramente un intento pa crea un imagen malo di e proyecto. Nada mas. Ademas Hutting ta recorda cu Telegraaf ta conoci di ta un medio cu ta contra parke- nan di molina y constantemente ta pone esaki den luz negativo. Mes momento segun Hutting, e supuesto experto cu Telegraaf ta uza, no tin conocimiento completo di e pakete di medida pa evita e problema menciona.

Hutting a splica Bon Dia Aruba, como reaccion riba e articulo, cu berdad e supuesto blackoutnan lo por a sosode, pero WEB a haci estudionan profundo pa ta 100% sigur cu e parkenan lo no causa e blackoutnan men-

cion. Un di e posibel solucionnan pa minimalisa e eventual posibilidad di blackout, ta pa uza un bateria grandi como backup, manera cu a sosode na Bonaire. Pero e bateria, manera a keda demostra na Bonaire, tabata mucho costoso. Y ta netamente e meta di gobierno di Aruba pa cambia e produccion di coriente den uno mas ‘berde’ pero mes momento percura pa reduccion di tarifa di coriente y/of haci esaki mas stabiel. “Ta netamente pa evita riba forma economico cu tin blackout na Aruba, cu ta bin cu un di dos parke di molina, cu lo ta situa na Urirama” Hutting ta sigui bisa.

Banda di esaki, WEB lo tuma un gran cantidad di medida pa haci miho uzo di e energia di biento acumula. E medidanan entre otro ta adapta e automatizacion di e unidadnan existente, y uzo di varios otro luga di almacenaje cu ta mas barata cu bateria, manera e asina yama ‘ice-based air-conditioning, fly wheels’ y ‘compressed air’.



“Nos di nos banda di parke di molina, cu ayudo di Lidar, lo percura cu e energia di e molinanan di biento riba termino corto (un cuarto di ora) lo por wordo miho pronostica, pa asina reduci e gastonan di e reserva coriente na WEB”. Esaki ta cosnan hopi nobo den mundo y Aruba ta tumando e posicion delantero den esaki segun Hutting. “Aruba por ta orguyoso cu esaki. Tur ta sosode riba maneranan hopi responsabel y ta reduci gastonan tambe”. Y cu tur e medidanan menciona, e

ta combati e risiconan menciona den e articulo di Telegraaf. Como ehempel, Hutting ta muestra cu e ‘fly wheels’ y e aire comprimido no ta necesario pa absorba e fluctuacion di biento, pero nan por almacena e exceso na energia di biento durante anochi. Ta sistemanan pues instala pa scapa placa. Si e sistema no funciona pa un otro motibo, e no ta causa un blackout segun Hutting.

Pa loko ta e riesgo financiero di e funcionamiento di e prototipo di e sistema di aire comprimido, WEB a percura pa pone e parti financiero aki den man di e fabricante di e proyecto. “Como tal ta haciendo tur cos menos gamble, manera cu e articulo ta sugeri,” Hutting ta sigui bisa.

Ademas segun Hutting, e asina yama experto cu Telegraaf a atende, no tin conocimiento di e pakete completo di medida cu tin cu evita e blackoutnan. E tin rason cu esaki por sosode, (esta e blackout) si nada wordo haci, pero esey awor no ta e caso. E expertonan di DNV GL, antes

KEMA, hunto cu esunnan di CBA den un segundo opinion, a muestra claramente durante nan estudio di simulacion, cu tur e medidanan lo evita e blackout. E estudio- nan aki a dura 2 aña y ta pues mucho mas confiabel cu un hende cu apenas tin conocimiento di e situacion local.

Ademas, Telegraaf (segun Hutting) ta un contrincante conoci di energia di biento y ta gusta bin cu tipo di noticianan asina sugestivo. Tur e otro partinan den e articulo (fuera di esunnan riba e parti di blackout) ta mesun sugestivo y locura total.

Asina ta haci mencion den Telegraaf cu e zonido di e turbinanan di biento lo por wordo scucha te den e cambernan di hotel na Palm Beach. “Si esey ta berdad, e molinanan di biento lo mester ta scuchabel den full San Nicolas.

En realidad, bo no por scucha esaki den e casnan den cercania segun Hutting. Y ey e cas mas cerca ta 450 meter for di e molinanan. Na Urirama e distancia mas serca cu un cas lo ta 1000 meter. De hecho, segun Hutting, e zonido di lama ta mas duro cu esun di e molinanan. Pues segun Hutting, no tin ningun motibo pa preocupacion. □